

মুরাদনগরে শিক্ষকদের বিরুদ্ধে নকলে সহযোগিতার অভিযোগ

■ মুরাদনগর (কুমিল্লা) সংবাদসূত্র

উপজেলার চলমান জেএসসি ও জেডিসি পরীক্ষায় নকলের প্রবণতা লক্ষ্য করা যাচ্ছে। বিদ্যালয়ের পাসের হার বাড়তে কামলমতি শিক্ষার্থীদের হাতে নকল তুলে দেওয়ার অভিযোগ উঠেছে কেন্দ্রে দায়িত্বপ্রাপ্ত কিছু শিক্ষকদের বিরুদ্ধে। আর এ কারণেই পরীক্ষায় নকলের প্রবণতা রোধ করা যাচ্ছে না।

জানা যায়, মুরাদনগর উপজেলায় ১৭টি পরীক্ষা কেন্দ্রের মধ্যে জুনিয়র স্কুল সার্টিফিকেট (জেএসসি) ১২টি, জেডিসি ৪টি ও ভোকেশনাল ১টি কেন্দ্রে পরীক্ষা অনুষ্ঠিত হচ্ছে। ওইসব পরীক্ষা কেন্দ্রগুলোতে পরীক্ষার প্রথম দিন কিছু শিক্ষার্থী প্রকাশ্যে নকল করলেও শিক্ষকদের একাংশ থাকেন দর্শকের ভূমিকায়। উপজেলার বেশ কয়েকটি পরীক্ষা কেন্দ্রে সরেজমিন অনুসন্ধানের ধরা পড়েছে এমন চিত্র। বিশেষ করে উপজেলা সদরের ডিআর সরকারি উচ্চ

বিদ্যালয়, নুরুন্নাহার বালিকা উচ্চ বিদ্যালয়, কোম্পানীগঞ্জ মদিউল আলম ডিগ্রি কলেজ, দায়েরা বিনেশ চন্দ্র উচ্চ বিদ্যালয়, নবীয়াবাদ ওয়াহিদ সরকার ফাজিল মাদ্রাসা, রামচন্দ্রপুর আকাব্বারের নেছা বালিকা উচ্চ বিদ্যালয়, পোনাকান্দা দারুলহুদা ফাজিল মাদ্রাসা, চাপিতলা ফরিদউদ্দিন ডিগ্রি কলেজসহ বেশ কয়েকটি কেন্দ্রে ওই ধরনের নকলের প্রবণতা লক্ষ্য করা গেছে।

এ ব্যাপারে উপজেলা মাধ্যমিক শিক্ষা কর্মকর্তা রতন কুমার সাহা বলেন, কোনো বিদ্যালয় পর পর তিনবার যদি পাসের হার পূর্ণ থাকে তাহলে তার এমপিও বাতিল হওয়ার ঝুঁকি রয়েছে। সংশ্লিষ্ট শিক্ষকদের নকলের কাজে সহযোগিতা করা থেকে বিরত থাকার জন্য পত্র দেওয়া হয়েছে। তারপরও অভিযোগ পাওয়া গেলে তাদের বিরুদ্ধে প্রয়োজনীয় ব্যবস্থা গ্রহণ করা হবে।

এ বিষয়ে উপজেলা নির্বাহী কর্মকর্তা মোহাম্মদ রশিদুল কাদের বলেন, 'কয়েকটি পরীক্ষা কেন্দ্রে নকল হয়েছে আমরা সেখানে নকলের অপরাধে শিক্ষার্থীদের বহিষ্কার করেছি।

সহযোগিতার কারণে শিক্ষকদেরকে দণ্ডিত থেকে অব্যাহতিসহ ভ্রাম্যমাণ আদালতের মাধ্যমে জরিমানা করেছে। নকল প্রতিরোধে আমরা ডিজিটাল টিম গঠন করেছি। এখন নকলে আর কোনো সহযোগিতা নেই। তিনি আরো জানান, পরীক্ষা শুরু হওয়ার পর থেকে এ পর্যন্ত দায়িত্ব অর্পণে একজন কেন্দ্র সচিবসহ ১৩ জন শিক্ষককে বহিষ্কারসহ দায়িত্ব থেকে অব্যাহতি দেওয়া হয়েছে। আর নকল করার অভিযোগে ৭ শিক্ষার্থীকে বহিষ্কার করা হয়েছে। এর মধ্যে নকলে সহযোগিতার অভিযোগে ৫ শিক্ষককে ভ্রাম্যমাণ আদালতের মাধ্যমে ৮০ হাজার টাকা জরিমানা করা হয়েছে।